

REZOLUTË
PËR VLERËSIMIN E VEPRIMTARISË SË ENTIT RREGULLATOR TË ENERGJISË (ERE) PËR
VITIN 2012

Kuvendi i Shqipërisë,

- Duke pasur parasysh rolin e Entit Rregullator të Energjisë, si autoriteti i vetëm dhe i pavarur rregullator për mbikëqyrjen e funksionimit të tregut të energjisë elektrike dhe të gazit natyror në vend;
 - Duke njohur arritjen tashmë disavjeçare të Qeverisë për furnizimin pa ndërprerje të konsumatorëve me energji elektrike;
 - Duke parë se përpjekjet e Entit Rregullator të Energjisë u fokusuan në drejtim të kontrollit të shërbimeve të ofruara në tregun e energjisë elektrike, cilësisë së tyre dhe mbrojtjes së konsumatorit;
 - Duke vlerësuar transparencën e ERE-s ndaj publikut, përmes konsultimeve dhe komunikimit me të gjitha palët e interesuara, si dhe me publikun e gjerë;
 - Duke pasur parasysh se të gjitha vendimmarrjet e ERE-s kanë synuar të stimulojnë investimet në segmente kyç të sektorit, të cilat ndikojnë në përmirësimin e kaskadës, në fuqizimin e rrjetit të transmetimit dhe atij të shpërndarjes, duke orientuar investimet në shpërndarje, në funksion të uljes së humbjeve në sistemin e shpërndarjes;
 - Duke konsideruar rëndësinë që ka liberalizimi i tregut të furnizimit me pakicë të energjisë elektrike;
 - Duke pasur parasysh se situata e sektorit të energjisë elektrike, në drejtim të realizimit të investimeve dhe gjendjes financiare të pjesëmarrësve të tregut të energjisë elektrike, ka qenë e vështirë, si pasojë e problematikave të vërejtura nga sjellja në treg e operatorit të sistemit të shpërndarjes;
 - Duke vlerësuar si shumë të rëndësishme punën për realizimin e mundësisë së furnizimit të vendit me gaz natyror, nëpërmjet alternativave më të favorshme dhe për përgatitjen e kuadrit rregullator në këtë fushë;
 - Duke pasur parasysh punën intensive që është bërë në drejtim të diversifikimit të furnizimit me energji në vend;
 - Duke vlerësuar arritjet dhe hapat përpara në tregun e energjisë elektrike, në kuadër të miratimit nga ERE të rregullave të balancimit të energjisë elektrike dhe ankandit të kapaciteteve të interkoneksionit;
 - Duke vlerësuar si përparësi kombëtare lidhjen e rrjetit energjetik shqiptar, nëpërmjet linjave të interkoneksionit 400 kw, me rrjetin energjetik ballkanik dhe tregun europian të energjisë;
- Konstaton se ERE në vitin 2012:**
- Ka shqyrtuar aplikimet për përditësimin e tarifave të të licencuarve në sektorin elektroenergjetik, përfshirë veprimtaritë e prodhimit, furnizimit publik me shumicë, transmetimit, shpërndarjes dhe furnizimit publik me pakicë të energjisë elektrike për klientët tariforë.
 - Ka kryer një veprimtari të gjerë për licencimin e subjekteve në veprimtaritë e ndryshme të sektorit të energjisë elektrike, si dhe atë të gazit natyror.
 - Ka miratuar udhëzuesit për menaxhimin dhe alokimin e kapaciteteve në Projektin Trans Adriatik Pipeline (TAP), një dokument me mjaft rëndësi, në kuadër të mbështetjes së projektit TAP AG, duke e fokusuar vëmendjen kryesore në mbështetjen e gjithanshme të përpjekjeve për konkretizimin e projektit TAP, për të krijuar hapësirat e nevojshme për interesat shqiptarë në të.
 - Ka ushtruar monitorime për të kontrolluar dhe inspektuar shërbimet e rregulluara të operatoreve të licencuar në sektorin e energjisë elektrike, në lidhje me mirëfunksionimin e tregut të energjisë elektrike, efikasitetit dhe cilësisë së shërbimit që ata ofrojnë për konsumatorët, në përputhje me autoritetin e dhënë sipas ligjit nr. 9072, datë 22.5.2003 “Për sektorin e energjisë elektrike”, të ndryshuar.
 - Ka garantuar mbrojtjen e vazhdueshme të interesave dhe të drejtave të konsumatorëve tariforë, nëpërmjet trajtimit me përkushtim, transparencë, paanshmëri dhe brenda afateve ligjore të ankesave të konsumatorëve.
 - Ka punuar në zhvillimin e kapaciteteve të veta institucionale për krijimin e kuadrit të domosdoshëm rregullator në fushën e gazit natyror, të harmonizuar me direktivat e BE-së dhe me vendet e rajonit.

- Ka realizuar metodologjitë përkatëse për miratimin e tarifave dhe studimeve të miratuara, sipas Deklaratës Rregullatore, përditësimin e tarifave dhe akomodimin e kostove të shërbimeve, si në veprimtarinë e prodhimit, furnizimit publik me shumicë dhe furnizimit publik me pakicë, duke pasur parasysh parimin për sigurimin e energjisë elektrike për konsumatorët, në përputhje me kostot më të ulëta dhe të arsyeshme.

- ERE ka orientuar punën e tij në drejtim të vendosjes së një bashkëpunimi me operatorët e tregut në sektorin e energjisë elektrike, nëpërmjet organizimit të takimeve periodike me ta.

- Në kuadër të një analize të kujdesshme dhe në konsultë edhe me institucionet e tjera përgjegjëse të sektorit të energjisë elektrike, por edhe me institucionet ndërkombëtare që mbikëqyrin këtë sektor, një nga vendimmarrjet më të rëndësishme të ERE-s ishte procedimi administrativ ndaj CEZ Shpërndarjes për heqjen e licencave në veprimtarinë e shpërndarjes dhe furnizuesit publik me pakicë.

- ERE ka vazhduar fuqizimin e kapaciteteve të veta institucionale për hartimin e kuadrit rregullator në fushën e energjisë elektrike dhe të gazit natyror, për ta harmonizuar atë me direktivat e BE-së dhe detyrimet e Traktatit të Komunitetit të Energjisë.

- Me qëllim rritjen e sigurisë së furnizimit në vend dhe në kuadër të një klime promovuese për investimet e reja, ka licencuar 49 subjekte juridike në prodhim energjie, tregtues energjie, furnizues të kualifikuar të energjisë elektrike, si dhe modifikime të licencave ekzistuese, ndërsa 11 aplikime janë në proces shqyrtimi.

- Ka konsoliduar akoma më shumë marrëdhëniet me Kuvendin e Shqipërisë dhe institucionet e tjera shtetërore dhe ka vazhduar të ndjekë një formë bashkëpunimi dhe informimi periodik për zgjidhjen e sfidave të ndeshura në procesin e rregullimit të sektorit të energjisë elektrike.

Kërkon që ERE për vitin 2013:

- Në përputhje me autoritetin dhe përgjegjësitë, në mënyrë të veçantë në kushtet e administrimit të përkohshëm të kompanisë së shpërndarjes, të fokusojë të gjitha përpjekjet në rivendosjen e një tregu funksional të bazuar në respektimin e marrëveshjeve dypalëshe, efikasitetit të energjisë elektrike, normalizimit të veprimtarisë së shpërndarjes dhe garantimit të furnizimit të pandërprerë të konsumatorëve.

- Të intensifikojë më tej punën për monitorimin, në mënyrë të veçantë të kompanisë CEZ Shpërndarje, për përmirësimin e treguesve kryesorë të saj në drejtim të humbjeve në rrjet dhe rritjes së arkëtimeve.

- Në analizë të problematikës së lindur nga mosmarrëveshjet me CEZ Shpërndarjen dhe në përputhje me kapacitetet institucionale dhe përgjegjësitë ligjore, të sigurojë mbështetje për institucionet përgjegjëse në mbrojtjen e interesave të shtetit shqiptar në procedimet administrative apo gjyqësore që kanë lidhje me këtë konflikt.

- Të vazhdojë veprimtaria në monitorimin e tregut të energjisë elektrike për të rritur transparencën dhe garantuar mosdiskriminimin, nëpërmjet procesit të hartimit të rregullave dhe rregulloreve, për të nxitur konkurrencën në këtë treg dhe orientimin e tij drejt liberalizimit dhe rritjes së konkurrencës në ankandet e alokimit të kapaciteteve të interkoneksionit.

- Të rishikojë Modelin e Tregut të Energjisë Elektrike, Rregullat e Alokimit të Kapaciteteve, Marrëveshjen e Shërbimit të Transmetimit, me qëllim harmonizimin me kushtet e reja të hapjes së tregut dhe përshtatjes së tij me tregun rajonal, nën frymën e përafrimit të legjislationit me Paketën e Tretë Rregullatore të Bashkimit Europian.

- Të vijojë punën në plotësimin e kuadrit rregullator dhe kryerjen e procedurave të nevojshme për mbështetjen e projekteve me interes kombëtar për gazifikimin e vendit.

- Të vazhdojë të garantojë mbrojtjen e konsumatorëve të energjisë elektrike, nëpërmjet trajtimit me përkushtim të ankesave të konsumatorëve, në përputhje me Kontratën e Furnizimit dhe Standardet e Trajtimit dhe Zgjidhjes së Ankesave të Konsumatorëve nga ana e të licencuarve, brenda kushteve dhe afateve të përcaktuara në këto akte.

- Të monitorojë cilësinë e shërbimit të ofruar konsumatorëve, për të garantuar furnizim të pandërprerë me energji elektrike në sistemin e shpërndarjes së energjisë elektrike, në përputhje me standardet minimale të cilësisë së shërbimit të energjisë, të miratuara nga ERE.

- Të inkurajojë realizimin e projekteve publike apo private për lidhjen e rrjetit energjetik shqiptar me rrjetin rajonal.

Miraturar në datën 2.5.2013

KRYETARE
Jozefina Topalli (Çoba)